



Nunat avannarliit siunnersuisooqatigiit Kalaallit Nunaata qanoq iluaqutiginerulersinnaaneraa pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq, Mariane Paviasen, Inuit Ataqtigiit)

Inatsisartunut ilaasortaq Mariane Paviasen qujanaq siunnersuummut.

Ukiorpaalussuanngorput, Demokraatiniit Nunat Avannarliit siunnersuisooqatigiivini aallartitaqaratta. Taamaattumik ataatsimiittoqartillugu, isumaqatiginninniartoqartillugu ataatsimoortoqartillugulu suleatigiinnerup qanoq inneranik paasinnittaaserput partiinit allanit allaaneruvoq.

Paasisinnaavarpulli, Nunat Avannarliit siunnersuisooqatigiivini ataatsimiinnerit Naalakkersuisunit pingaartinneqartut. Taamaammallu uani katersuunnermi unillatsiaqqammerpugut, Naalakkersuisunut ilaasortat arlallit Olso-mi Nunat Avannarliit siunnersuisooqatigiivisa aqqissuussaannut peqataaniarmata. Angusarisimasat imaluunniit angunngittuukat Nunat Avannarliit siunnersuisooqatigiivisa naapinneranni nalunaarutigineqarneri sakkukippallaarput. Tamanut ilisimatitsissutaasut annikitsuinnaasimapput.

Tamanna eqqarsaatigalugu uagutsinnut ersarissumik oqaatigiuminaappoq, Nunat Avannarliit siunnersuisooqatigiivi sukut iluaqutaanersut. Uparuarusupparpulli, nunat avannaamioqatigiit ajunngitsorpassuarnik suliaqartartut, soorlu assersuutigalugu ullutsinnut tulluuttumik inuunerissaarnissamut ilinniarfiillu ingerlalluarnissaannik sulissuteqarsimasunik. Meeqqat atuarfii nunani avannarlerni qaffasissumik pitsaassuseqartutut ilisarnaateqarput.

Demokraatit tamanna tunngavigalugu isumaqarput, Nunat Avannarliit siunnersuisooqatigiivi annerusumik oqallittarfittut isigineqartariaqartoq, paasisassanik iluatinnaatilinnik paasisaqarfiususaaq, nunat avannarliit qanoriliortarnersut taakkuninngalu isumassarsilluta nunatta atugarissaarnermik ilinniartitaanermillu ineriartornissaanut. Piumasaqaataavorli, eqqortumik anersaaqarluni suliniamut peqataalerneq kissaatigalugu misilittakkanik avitseqatigiinneq ilisimasanillu avitseqatigiinneq. Uagut naliliinerput unaavoq, uagut Kalaallit Nunaanni tassunga pitsaanagerusariaqartugut, Nunat Avannarliit siunnersuisooqatigiivini suliaqut annertunerusumik iluaqutiginiarlugit.

Tamatumalu saniatigut siunnersuuteqartoq isumaqatigaarput oqarmat, periarfissaasariaqaraluartoq nammineq oqaatsit atornissaat namminerlu oqaatsigut atorlugit ilisimasanik pissarsinissaq. Tassani ilaasortaaitatta immaqa sulissutigisinnaagaluarpaaq, Nunat Avannarliit siunnersuisooqatigiivi EU-mit isumassarsinissaat. Aallarniutitut imaattariaqaraluarpoq, allagaatit isumaqatigiissutillu qitiusut soorlu assersuutigalugu Helsingfors-isumaqatigiissut nunani avannaani oqaatsinut tamanut nutserneqarpat tassani aamma kalaallisuumut.

Tassalu Demokraatit oqallinnermut isummersuutaat.